



Sesida dals

17 da favrer 2026

Communitgà ils

19 da favrer 2026

Protocol nr.

118/2026

Dumonda Bischof

concernent la garanzia da las resursas finanzialas e spazialas sco er concernent l'ulteriur svilup da projects sco soluziuns da cuntinuaziun da la Chasa da dunnas dal Grischun

Resposta da la Regenza

Tar las dumondas 1 e 2: Las pretensiuns envers ils alloschis da protecziun s'orienteschan tenor il rapport explicativ tar la Convenziun d'Istanbul a las recumandaziuns da la task force dal Cussegl da l'Europa. Sco valur directiva prevesan quellas almain ina piazza da famiglia per 10 000 abitants. Decisiv per la planisaziun efectiva da las capacitads resta però il basegn specific dal pajais respectiv resp. da la regiun respectiva. Igl è l'incumbensa dal chantun da garantir, tenor il basegn, avunda plazzas per victimas en alloschis da protecziun e da procurar per ina finanziaziun economicamain adequata da questas plazzas. Il chantun Grischun ademplescha questa incumbensa e finanziescha ils alloschis da protecziun cun agid d'ina incarica da prestaziun cun la fundaziun Chasa da dunnas dal Grischun. Per ils onns 2026–2029 ha la Regenza concludì ina nova incarica da prestaziun cun la Chasa da dunnas dal Grischun. Sin basa da las infurmaziuns actualas metta il chantun Grischun a disposiziun avunda plazzas protegidas per ses agen basegn. Las cifras d'occupaziun èn creschidas cuntinuamain en la perioda dal 2018 fin il 2025. L'onn 2021 – l'ultim onn da la cunvegna da prestaziun 2018–2021 – era l'occupaziun tar 40,3 % (441 dis d'occupaziun). L'onn 2025 – l'ultim onn da la cunvegna da prestaziun 2022–2025 – è l'occupaziun stada 77,4 % (847 dis d'occupaziun). Quai che n'è betg s'augmentà durant quest temp, mabain è percenter sa reduci, è la quota da dunnas e d'uffants domiciliads en il Grischun che ha fatg diever da la purschida da la Chasa da dunnas dal Grischun. L'onn 2021 importava la quota 63 % resp. 278 dis d'occupaziun e l'onn 2025 22 % resp. 187 dis d'occupaziun. Per resumar sa mussi, che l'occupaziun pli gronda dals ultims onns è d'attribuir a dunnas ed ad uffants cun domicil en auters chantuns.

En quai che pertutga la finanziaziun, sa participescha il chantun – ultra da l'indemniaziun dependenta da la prestaziun che vegn pajada tras l'Agid a victimas dal Grischun – cun ina garanzia annuala da 100 000 francs a la finanziaziun da la Chasa da

dunnas dal Grischun, e quai fin ad in'occupaziun da 60 pertschient. Per ch'i possa exister a lunga vista ina purschida economica e d'auta qualitat, sto la Chasa da dunnas cuntanscher in'occupaziun d'almain 60 pertschient. En cas d'ina occupaziun tranter 60 % e 75 % sa participescha il chantun ad in eventual deficit dal retgav fin ad in import maximal da 100 000 francs. – A partir d'ina occupaziun da 75 % vegn quinta cun in manaschi che cuvra ils custs. Per l'indemnisaziun dependenta da la prestaziun vegnan mess a quint als posts assegnants, latiers tutga er l'Agid a victimas dal Grischun, mintgamai 356 francs per dunna e per uffant per di tras la Chasa da dunnas (tariffas valaivlas a partir dal 01-01-2026). En vista ad in'occupaziun da var 75 % – quai che correspunda a las directivas da la Conferenza da las directuras e dals directurs chantunals dals affars socials (CDAS) – sco er en vista ad in'occupaziun chantunala tut en tut bassa, n'èsi actualmain betg previs d'engrondir las plazzas protegidas u la finanziaziun. La situaziun vegn evaluada cuntinuadamain.

Tar la dumonda 3: La Polizia chantunala dal Grischun scolescha ses confamigliars tenor ils standards naziunals. Temas sco il stadi da dretg, l'etica, ils dretgs umans, il cumportament professiunal sco er il tractament respectus envers differentas gruppas da la populaziun èn parts integralas da la scolaziun da basa e da la furmaziun supplementara. Sco er auters chantuns desista il Grischun da moduls speziels supplementars e focussescha empè da quai sin ina integraziun lianta en las instrucziuns da scolaziun e da direcziun existentas. La Regenza è da l'avis, che quest proceder integrativ saja cunvegnent e correspundia a las pretensiuns envers ina lavur da polizia professiunala ch'è libra da discriminaziuns. Actualmain na datti nagin motiv d'introdur ulteriurs formats da scolaziun obligatorics. La prevenziun, l'intervenziun e la protecziun da victimas pretendan ina interacziun da tut ils acturs che funcziunia, e betg primarmain engrondiments instituziunals.

Tar la dumonda 4: Ensemen cun las organisaziuns e cun ils uffizis involvids realise-scha il Post da coordinaziun Violenza a chasa activamain las mesiras da prevenziun e da sensibilisaziun sin basa da la strategia chantunala cunter violenza a chasa. En ses sector è mintga post responsabel per realisar las mesiras. Pitgas impurtantas èn ils «Dis d'aziun annuals cunter violenza a chasa», la campagna interchantunala «Toxic Love» sco er ina campagna trilingua chantunala cunter violenza a chasa, lantschada per l'emprima giada l'onn 2025.



En num da la Regenza

Il president:

Martin Bühler

Il cancellier:

Daniel Spadin